

tiano el signor Marchese dil suo bon voler verso el Stado nostro, et eussi semo per tenir bon conto, come sempre havemo fato di soi progenitori. Quanto a tuorlo a' nostri stipendii, adesso non è tempo per non far moto a li principi christiani; ma come l'acaderà, si recorderemo de tal oblatione di soa excellentia, qual tenimo a mente; con altre parole etc. Ave 11 di no.

Fu poi posto, per sier Zuan Contarini savio ai ordeni, che la letera fu preso di scriver a sier Antonio Surian dotor et cavalier orator nostro in Anglia, de comunicar al Re li successi de Verona con li agenti cesarei, qual fo suspesa per lui, poi per parte presa in Pregadi fin ozi, vol la sia mandata con certe reformation che se li manda per sua instruzion, non che debbi principiar, ma si 'l sarà rechiesto di questo debbi dir, *ut in litteris*, qual per lui fu fato notar.

Et andò primo in renga et parlò per la sua opinion; li rispose sier Lorenzo Venier dotor, savio a Terra ferma, et li Savii tutti messeno star sul preso et su la prima letera. Andò le do opinion: 31 fo dil Contarini, 130 dil resto di Savii, et questa fu presa.

Fu poi intrato su la materia di le galie di Barbaria deputà a scala nova, qual non ha trovato parte etc. Et fu posto, per sier Zuan Contarini savio ai ordeni, et sier Piero Corner suo colega, et sier Zuan Dolfin, sier Hironimo Querini, sier Michiel Morexini savii sora la merchadantia, non havendo le tre galie poste al viazo di Barbaria con la scala di Lisbona etc. trovato patron, li sia cresuto altri ducati 500 di don per galia di danari di Avogadori extraordinarii, di debitori da esser fatti et che si farano, exeto dil Sal, e mità dil neto fazi il deposito a di 25, et meti banco zorni 3 poi sarà zonto il salvoconduto.

182 Et sier Marin Justinian savio ai ordeni, messe voler l'incanto primo, che fo di do galie, al dito viazo, con don ducati 5000 per galia, *ut in parte*.

Et sier Fantin Zorzi savio ai ordeni, messe voler l'incanto primo, che è *solum* in Barbaria, e non vadi a Lisbona, et siano do galie, come prima fu preso a di ultimo dil mese di . . .

Et sier Antonio Trun procurator, savio dil Consejo, messe che la presente materia di mandar galie al viazo di Barbaria sia deferita a questa altra settimana, e il Colegio vengi con le so' opinion, *adeo* è di spesa a la Signoria ducati 21 milia.

Andò le parte: fo una non sincere, 2 di no, 8 dil Justinian, 3 dil Zorzi, 73 dil Contarini e altri, 85 dil Trun di l'indusia. *Iterum* balotate queste do ultime opinion, fo . . . non sinceri, 88 dil Trun di

l'indusia, 93 dil Contarini e altri, e questa fu presa; siehè la terra vol al tutto si navigi, et *maxime* servar Lisbona.

Fu poi posto, per i Consieri, Cai di XL e Savii, havendo richiesto per sue letere sier Alexandro Michiel contestabile a Ponte Vico, poter ussir fuora di la rocha per udir messa do zorni a la septimana con do compagni; et visto le letere di rectori di Brexa, che scrive sopra questa materia che si pol farli tal concession, *maxime* perchè il precessor suo poteva ussir ogni zorno; e atento che ditto castello non sotozaza al Consejo di X, come apar per la parte presa a di 11 Setembrio 1468, pertanto sia preso et concesso che 'l ditto Castelan possi ussir con due stipendiarii do zorni di la septimana fuora di castelo, ma ben non dormir fuora, *ut in parte*. Ave 114, 54 di no, 2; fu presa.

Fu posto prima, per sier Marco Contarini, sier Alvixe Barbaro, sier Gabriel Moro el cavalier provedador al Sal, *cum sit* che a di 24 Octubrio proximo passato fusse preso che 'l sia ministrà raxon a tutti scontadori con paxe di Rufin fo dazier dil Sal in Verona dil 1507 e 1508; et perchè era venuto il tempo di la satisfazion avanti il principiar di la guerra, *unde* la comessaria qu. sier Hironimo da Canal qu. sier Nicolò è restà ereditor di ducati 574, grossi 10, et dil 1507 a di 13 Setembrio veniva a compir el tempo a di 13 Marzo dil 1509 dil sconto fato con el deto dacier, che fo avanti il partir di Provedadori zenerali nostri per campo; e atento tutti li altri scontono in dito tempo sono stà satisfati salvo questa comessaria, et fo suspeso la sententia bonificata per i Capi dil Consejo di X atento il capitolo di trieve, per tanto sia preso che 'l ditto credito di la comessaria dil qu. sier Hironimo da Canal sia ritornà in l' officio dil Sal in quello esser era avanti fusse fato il sconto sopradito, e datoge la sua anzianità secondo el consueto di l'officio. Ave 142, 11, 10; fu presa. Et nota. Sier Antonio da Canal è provedador al Sal, qual fe' meter sta parte et non fo nominato perchè non si poteva impazar.

A di 2. La matina, se intese il Principe star a 182 l'usato; va scorendo.

Vene in Colegio l'orator dil marchese di Mantoa, al qual fo leto la deliberation dil Senato di eri; il qual disse scriveria al signor Marchese.

Nota. El dito signor eri, fo a di primo, zouse a Sanguanedo con 200 cavalli, e lui con alcuni di soi a piedi alozò in castelo ne la parte di mio nipote sier Marco Antonio Venier, qual fo eonzata con tapezarie etc., et li mandoe uno presente di cosse quadragesi-